

20 JUN 2002

Mahathir-Keluarga

MASALAH PERPECAHAN KELUARGA PERLU DIATASI, KATA DR MAHATHIR

KUALA LUMPUR, 20 Jun (Bernama) -- Datuk Seri Dr Mahathir Mohamad meminta masyarakat Melayu mengatasi masalah perpecahan keluarga (broken homes) bagi mengelakkan kesan buruk terhadap anak mereka.

Beliau bimbang dengan kadar perceraian di kalangan orang Melayu yang mungkin menjadi satu daripada sebab keruntuhan akhlak dalam masyarakat Melayu.

"Agama Islam membenar kita berkahwin dua, tiga atau empat tetapi jika kita tidak dapat berlaku adil kepada isteri-isteri ini kita disuruh kahwin satu sahaja," katanya dalam ucapan dasar presiden Umno pada Perhimpunan Agung Umno di Dewan Merdeka, Pusat Dagangan Dunia Putra di sini hari ini.

Perdana Menteri berkata beliau percaya ramai yang beristeri lebih daripada satu tidak dapat berlaku adil kepada isteri-isteri mereka.

"Ada yang bercerai dan ada yang tidak ambil berat akan nasib isteri-isteri yang tidak diceraikan, dengan tekanan emosi dan perasaan ke atas mereka yang tidak mendapat layanan sewajarnya sebagai isteri," katanya.

Beliau berkata keluarga yang sedemikian sudah tentu tidak dapat memberi teladan yang baik kepada anak-anak atau memberi didikan yang berkesan.

"Tak mungkin bapa memberi masa dan perhatian kepada semua anak daripada semua isteri, terutama isteri yang bukan favouritnya," katanya.

Walaupun tidak ada kajian dibuat mengenai keluarga yang berpecah dan kesannya terhadap anak mereka, beliau berkata perpecahan keluarga biasanya mempunyai kesan yang buruk kepada anak.

Perdana Menteri berkata apabila ibu bapa tidak mempunyai budaya dan nilai yang baik, sudah tentu mereka tidak dapat mendidik anak dengan nilai hidup yang sempurna.

Katanya, walaupun ramai ibu bapa kaum Melayu bertanggungjawab terhadap didikan anak-anak, ramai juga yang tidak mengambil berat soal itu.

"Sementara ibu bapa kaum lain mengawal dan mengawasi anak supaya mereka tekun belajar di rumah dan di sekolah, ibu bapa kaum Melayu tidak begitu mengambil berat.

"Sudah tentu nilai-nilai lain yang baik juga tidak dipupuk sehingga berkesan," katanya.

Selain ibu bapa, katanya, guru juga mempunyai peranan dalam didikan akhlak anak-anak.

Memandangkan kerajaan memperuntukkan 20 peratus daripada belanjawan negara untuk pelajaran dan lebih 30 peratus atau 300,000 daripada kakitangannya adalah guru, beliau berkata sepatutnya dengan tumpuan besar itu semua anak mendapat didikan yang baik termasuk akhlak.

"Sesungguhnya mereka yang mengabaikan tugas pendidikan ini, mereka yang sebaliknya mengajar supaya bermusuhan dan membenci sesama orang Melayu dan Islam, mereka yang tidak menyemai nilai-nilai Islam yang sebenar, nilai-nilai yang semuanya mulia, mereka ini mengkhianati agama dan bangsa Melayu," katanya.

Perdana Menteri percaya jika ibu bapa menunjukkan teladan yang baik dan pendidik menjalankan tanggungjawab mereka secara ikhlas, banyak gejala sosial di kalangan orang Melayu dapat dielakkan.

Beliau tidak menafikan faktor-faktor lain termasuk penayangan gambar keganasan dan lucah melalui Internet dan televisyen turut menyumbang kepada keruntuhan akhlak.

Bagaimanapun kata Dr Mahathir, ia tidak menjawab persoalan kenapa lebih

ramai orang Melayu yang terlibat dengan gejala sosial.

"Dalam perkara ini, kita harus ikhlas dan memperkatakan yang benar.

"Hanya dengan mengetahui sebab yang sebenar baharulah dapat kita mengubatinya," katanya.

-- BERNAMA

JM AZZ RHM